

# 段祺瑞病故

## 市隱

八二

以三造共和著稱之段祺瑞，於十一月二日午後八時病故於滬寓，享年七十三歲。先是段氏於民國二十二年曾患胃潰瘍症，經已治癒。本年秋間偶失調攝，忽患吐瀉症，延中醫診治，服藥十餘次，不見功效。十月二十日起病勢漸增，改請西醫診察，始知舊症胃潰瘍復發，雖經設法治療，終無起色，遂於二日逝世。

段氏逝世，全國震悼，紛往弔唁。國民政府以段氏功在民國，特通令全國各機關於五十大殮之日下半旗，以誌哀悼。國府主席林森輓以元老徽猷四字。行政院長蔣中正除發電弔

唁外，並派上海市長吳鐵城代表行政院致祭。國民黨中央執行委員會常務委員會並議決國葬段氏。

段氏憂國心切，在世時曾立有遺囑，名正道老人遺囑，其中以八事戒世如次：

- (一) 勿因我見而輕啓政爭；
- (二) 勿尙空談而不顧實際；
- (三) 勿與不急之務而浪用民財；
- (四) 勿信過激之說而自搖邦本；
- (五) 講外交者勿忘鞏固國防；
- (六) 司教育者勿忘保存國粹；

- (七) 治家者勿棄固有之禮教；
- (八) 求學者勿驚時尚之紛華。

段氏本袁世凱部將，清季袁練兵北洋時，段已脫穎而出，與王士珍、馮國璋、齊名，有虎將之稱。辛亥革命軍興，段氏聯合袁部各將要求清帝退位，促成共和之局。民國四年袁謀稱帝，段氏託病去職。民國六年張勳復辟，段氏誓師馬廠，討平之。此其功在民國之彰明較著者也。自民國十五年去執政職後，息影津門，深居簡晦，不問政事。至二十二年始遷寓上海。平日信佛至篤，茹素嗜經，修養頗勤，間或以下棋爲消遣，生活極爲優閒。自噩耗傳出後，朝野咸嘆國喪元良云。

